

“Smart bank” акциядорлик жамияти  
Кузатув кенгашининг  
2023 йил “6” феврал даги  
06-02// - сонли йиғилиш баённомасига  
20-илова

“SMART BANK” АКЦИЯДОРЛИК ЖАМИЯТИНИНГ  
ДЕПОЗИТ СИЁСАТИ

Тошкент – 2023 йил

Мазкур “Smart bank” акциядорлик жамиятининг депозит сиёсати (кейинги ўринларда Сиёсат деб юритилади) Ўзбекистон Республикасининг “Банклар ва банк фаолияти тўғрисида”ги, “Акциядорлик жамиятлари ва акциядорларнинг ҳуқуқларини ҳимоя қилиш тўғрисида”ги қонунлари ва бошқа амалдаги қонунчилик ҳужжатларига ҳамда “Smart bank” акциядорлик жамияти Уставига мувофиқ ишлаб чиқилган.

### 1-боб. Умумий қоидалар

1. Ушбу Сиёсат “Smart bank” акциядорлик жамиятининг (кейинги ўринларда Банк деб юритилади) пул маблағларни депозитларга жалб қилиш, ресурсларини шакллантириш ва қайтариш ҳамда жалб қилинган маблағлар бўйича фоиз ставкаларини шакллантириш соҳасидаги фаолиятининг асосий вазифаларини белгилаб беради.

2. Сиёсатда қуйидаги тушунчалардан фойдаланилади:

**депозит** - талаб қилиниши биланоқ ёки тўловни амалга оширувчи шахс билан тўловни олувчи шахс ёхуд уларнинг қонуний вакиллари ўртасида келишилган муддатда фоизлар ёки устама ҳақ тўлаган ҳолда ёхуд бундай тўловларсиз қайтариб бериш шарти билан топшириладиган миллий ва чет эл валютасидаги пул суммаси;

**ўргача тортилган фоиз ставкаси** - ҳисобот даврида миллий валютада жалб қилинган юридик шахсларнинг жамғарма ва муддатли депозитлари ҳамда жисмоний шахсларнинг талаб қилиб олингунча, жамғарма ва муддатли омонатлари, шунингдек банк пластик карталаридаги маблағлар бўйича белгиланган йиллик фоиз ставкалари ҳамда умумий депозитлар (омонатлар) суммасидан келиб чиққан ҳолда ҳисобланадиган фоиз ставкаси;

**депозит операциялари субъекти** - юридик ва жисмоний шахслар;

**депозит операциялари объекти** - юридик ва жисмоний шахсларнинг пул маблағлари.

### 2-боб. Сиёсатнинг асосий мақсади ва вазифалари


3. Сиёсатнинг асосий мақсади кенг кўламдаги молиявий хизматларни кўрсатиш орқали пул маблағларини депозитларга жалб қилишни мувофиқлаштириш ва Банкнинг ресурс базасини мустаҳкамлаш ҳисобланади.

4. Банк ўз фаолиятини юритиш давомида бозор конъюнктураси ва стратегик мақсадларидан келиб чиқиб, пул маблағларни депозитларга жалб қилиш воситаларининг турларини кенгайтириб ва такомиллаштириб боради.

5. Сиёсатнинг вазифалари қуйидагилардан иборат:

а) пул маблағларини қулай шартлар ва баҳолар асосида жалб қилиш;

б) пул маблағларини узоқ муддатли депозитларга жалб қилиш орқали барқарор ресурс базасини шакллантириш;



в) жисмоний шахслардан пул маблағларни омонатларга жалб қилиш ҳамда омонатлар ҳажмининг ўсишини ва жамғарилишини таъминлаш;

г) пул маблағларини жалб қилиш воситаларининг жозибадор турларини жорий қилиш орқали аҳолининг жамғариш ва инвестициявий фаоллигини рағбатлантириш;

д) депозит портфелини самарали бошқариш ва диверсификация қилиш.

6. Банкда депозитларни самарали бошқариш мақсадида депозитлар таркиби ва тузилмаси тўғрисида ойлик ҳисоботлар жорий қилинади.

7. Ҳазначилик бошқармаси томонидан депозитлар бўйича Банк Бошқарувига ҳисоботлар тақдим этиб борилади.

8. Банк бозордаги ҳолат бўйича аниқ ва ўз вақтида олинган маълумотларга асосланиб, жалб қилинаётган маблағлар турларининг афзалликлари ва камчиликларини батафсил аниқлаб олади.

### 3-боб. Сиёсатнинг тамойиллари ва омиллари

9. Сиёсат Банкнинг бошқа сиёсатлари билан узвий боғлиқ бўлиб, Банк стратегиясининг ва/ёки умумий сиёсатининг бир қисми ҳисобланади.

10. Сиёсатни шакллантиришда қуйидаги асосий тамойиллар ҳисобга олинади:

а) харажатларнинг энг мақбул даражасини таъминлаш орқали барқарор фойда;

б) депозит операцияларини амалга оширишда Банкнинг ишончлилики;

в) депозит операцияларда асосий эътиборни барқарор ресурсларга қаратиш;

г) жалб қилинган маблағлар ва йўналтирилган маблағлар муддатилари ҳамда ҳажмларининг ўзаро мутаносиблигини бошқариш.

11. Сиёсатни амалга оширишда қуйидаги омиллар ҳисобга олинади:

а) Банкнинг жорий ва узоқ муддатли ривожланиш стратегияси;

б) депозитларни жалб қилиш ва жойлаштиришда молия бозорининг жорий ҳолати ва тенденциялари;


в) қайта молиялаш ставкаси;

г) амалдаги қонунчилик ҳужжатларига киритилган ва/ёки киритиладиган ўзгартириш ва қўшимчалар.

12. Банкнинг мазкур Сиёсати депозит бозорини таҳлилини ўтказиш, пул маблағларини жалб қилинишида харажатларни минималлаштириш, депозит портфелни бошқариш ҳамда Сиёсатни самарали юритиш каби чора-тадбирларни ўз ичига олади.

### 4-боб. Пул маблағларини депозитларга жалб қилиш

13. Банк томонидан қуйидаги воситалар ва йўллар орқали пул





маблағларини депозитларга жалб қилинади:


- а) жисмоний шахслардан пул маблағларини жалб қилиш;
- б) юридик шахслардан пул маблағларини жалб қилиш;
- в) банклараро бозордан маблағларни жалб қилиш;
- г) қимматли қоғозларни муомалага чиқариш.

14. Банк томонидан пул маблағларини жисмоний шахслардан жалб қилинишидаги асосий йўналишлар:

- а) аҳоли учун қулай ва жозибадор омонат турларини жорий этиш;
- б) масофавий банк хизматлари орқали кўрсатиладиган молиявий хизматларни ривожлантириш орқали талаб қилиб олгунча ва пластик карталаридаги пул маблағлари салмоғини ошириш;
- в) пул маблағларини жалб қилишда замонавий информацион технологиялардан фойдаланган ҳолда электрон хабар юбориш тизими, Банк мобил иловаси ва веб-сайти орқали операцияларни амалга оширишни такомиллаштириб бориш;
- г) фуқароларнинг Банкдаги омонатларидаги пул маблағларининг қайтарилиши тўлиқ ҳажмда кафолатланганлигини кенг тарғиб этиш орқали Банкка бўлган ишончини тобора мустаҳкамлаш ва омонатларни кўпроқ жалб қилиш;
- д) узоқ муддатли ресурс базасини шакллантириш мақсадида жисмоний шахсларнинг узоқ муддатли депозитлари улушини ошириб бориш.

15. Банк томонидан пул маблағларини юридик шахслардан жалб қилинишидаги асосий йўналишлар:

- а) молиявий хизматларнинг турларини кўпайтириш ва сифатини ошириш ҳамда икки томонлама манфаатли бўлган муносабатларни мустаҳкамлаш орқали Банкка пул маблағларини жалб қилиш;
- б) корпоратив мижозларга жозибадор хизматларни кўрсатиш орқали уларнинг жорий ҳисобварақларига ва депозитларга жалб қилиш;
- в) мижозлар билан узоқ муддатли ҳамда ўзаро манфаатли ҳамкорлик муносабатларини шакллантириш. Хусусан, йирик корхоналар ҳамда тадбиркорлик субъектлари учун уларнинг эҳтиёжларидан келиб чиққан ҳолда кенг кўламдаги молиявий хизматлар кўрсатиш тизимини жорий этиш ва такомиллаштириш;
- г) депозит бозоридаги талаб ва таклиф таҳлил қилинган ҳолда янги банк маҳсулотларини ишлаб чиқишда асосий эътибор депозит жалб қилиш тизимини автоматлаштириш орқали мазкур жараённи оптималлаштириш;
- д) масофавий банк хизматлари орқали кўрсатиладиган молиявий хизматларни ривожлантириш орқали пул маблағларини жалб қилиш;
- е) узоқ муддатли ресурс базасини шакллантириш мақсадида юридик шахсларнинг узоқ муддатли депозитлари улушини ошириб бориш.



16. Банк томонидан пул маблағларини банклараро бозордан жалб қилинишидаги асосий йўналишлар:

а) Банк томонидан қисқа муддатли ликвидликни таъминлаш ҳамда жорий тўловларни молиялаштириш мақсадида банклараро бозордан пул маблағлари жалб қилинади;

б) Банкнинг банклараро депозит бозоридаги фаолияти молиявий жиҳатдан барқарор ҳамда яхши нуфузга эга бўлган банклар билан ишлашга асосланади;

в) Банк ҳамкорлар билан ҳуқуқий муносабатларга киришиш ва банклараро амалиётлар бўйича ўзаро лимитларни белгилаш орқали банклараро депозит бозорида бошқа банклар билан ҳамкорлигини ривожлантириб боради;

г) Банк бошқа банклар томонидан жойлаштириладиган депозитлар ҳажмининг ортиб боришига интилади.

17. Банк томонидан пул маблағларини қимматли қоғозларни муомалага чиқариш йўли орқали жалб қилинишидаги асосий йўналишлар:

Банк қимматли қоғозларининг асосий шакллари бўлиб депозит сертификатлари ва омонат сертификатлари ҳамда облигациялар ҳисобланади.


а) юридик шахсларга мўлжалланган депозит сертификатлар ҳамда жисмоний шахсларга мўлжалланган омонат сертификатларининг эмиссиясини амалга ошириш;

б) узоқ муддатли ресурс базасини мустаҳкамлаш мақсадида юридик шахслар ўртасида жойлаштириладиган узоқ муддатли корпоратив облигациялар ҳамда субординар қарз мажбуриятларини муомалага чиқариш.

### **5-боб. Депозитлар бўйича фоиз ставкаларини шакллантириш**

18. Депозитлар бўйича фоиз ставкаларини шакллантириш қоидалари Ўзбекистон Республикаси Адлия вазирлигида 2015 йил 3 июлда 2692-сон билан рўйхатга олинган “Тижорат банклари томонидан жалб қилинадиган депозитлар (омонатлар) бўйича фоиз ставкаларини шакллантириш механизми тўғрисида”ги Низом талаблари асосида ҳисобланади.

19. Банк томонидан Сиёсатни юритиш ҳамда депозитларнинг муддатлари ва фоиз ставкаларини белгилашда ушбу маблағларни жойлаштириш муддатлари ҳамда ставкалари инобатга олинади. Шунингдек, янги омонат ва депозит турларини жорий қилишда Банкнинг даромадлилигини ошириш ҳамда ликвидлилигини мустаҳкамлаш тамойили устувор ҳисобланади. Бунда, даромадлилик ва ликвидлилик, шунингдек Банк мажбуриятларининг қиймати ҳамда муддатлари мунтазам таҳлил қилиб борилади.





## 6-боб. Ҳисоб ва назорат

20. Банк амалдаги қонунчилик ҳужжатлари асосида юридик шахслар ва жисмоний шахслар учун миллий ҳамда чет эл валютасида ҳисобварақлар очади ва уларнинг ҳисобини юритади.

21. Депозитлар бўйича фоизлар амалдаги бухгалтерия ҳисоби ҳамда солиқ қонунчилигига мувофиқ ҳисобланиб борилади ва тўланади.

22. Пул маблағларини депозитларга жалб қилишдан олдин Ғазначилик бошқармаси томонидан маблағларни депозитларга жалб қилишнинг иқтисодий асосланганлиги бўйича таҳлил ўтказилади.

Ўтказилган таҳлиллар иқтисодий асосланганлигидан сўнг маблағларни жалб қилиш бўйича тегишли қарор белгиланган тартибда қабул қилинади.

23. Депозитларнинг муддати, миқдори ҳамда фоиз ставкаларини мувофиқлаштириш тегишли таркибий тузилмалар томонидан Ғазначилик бошқармаси билан келишилган ҳолда амалга оширилади.

24. Ғазначилик бошқармаси томонидан депозитлар ва фоиз ставкаларини шаклланиши бўйича ҳар чоракда тўлиқ таҳлил қилинади ва ҳисоботларни юритади ҳамда банк бошқарув органларига ва тегишли ваколатли ташкилотларга тақдим этиб боради.

25. Ҳисоботлар турига қараб тегишлича Банкнинг Кузатув кенгашида, Банк Бошқарувида ва Ликвидлилик кўмитасида кўриб чиқилади ва қарор қабул қилинади.

26. Сиёсат талабларини бажарилишини юзасидан Банк Кузатув кенгашига ҳисобот тақдим қилиб бориш Банкнинг Ғазначилик бошқармаси томонидан амалга оширилади.

## 7-боб. Якуний қоидалар


27. Банкнинг тегишли раҳбар ва ходимлари томонидан мазкур Сиёсат талабларига риоя қилинмаган тақдирда уларга нисбатан амалдаги тартиб-қоидаларга асосан интизомий чоралар ўрнатилган тартибда қўлланилади.

28. Банкнинг тегишли таркибий тузилмалари амалдаги қонунчилик ҳамда мазкур Сиёсат доирасида депозитлар ва бошқа инструментлари орқали маблағларни жалб этишда назорат функциясини ўз йўналишлари бўйича амалга оширади.


29. Мазкур Сиёсатга киритиладиган ўзгартириш ва қўшимчалар Ғазначилик бошқармаси тавсияси асосида Банк Бошқаруви томонидан киритилади ва Банк Кузатув кенгаши томонидан тасдиқланади.

30. Мазкур Сиёсат билан тартибга солинмаган масалалар Ўзбекистон Республикасининг амалдаги қонунчилик ҳужжатларида белгиланган тартибда ҳал этилади.

31. Ушбу Низомнинг алоҳида бандлари Ўзбекистон Республикаси



амалдаги қонунчилиги ёки Банк Уставига зид бўлса, ушбу бандлар ўз кучини йўқотади ва ушбу бандларга ўзгартириш ва қўшимчалар киритилгунга қадар Ўзбекистон Республикасининг амалдаги қонунчилик ҳужжатлари нормаларига ва Банк Уставига амал қилинади.



[Handwritten signatures]

# ЮРИДИК ХУЛОСА

\*\*\*\*\*

(норматив-ҳуқуқий ҳужжатни ҳуқуқий экспертизадан  
ўтказиш тўғрисида)

Экспертиза ўтказувчи	Юридик департаменти
Экспертизада н ўтказилган меъёрий ҳужжат номи	“Smart bank” акциядорлик жамиятининг Депозит Сиёсати.
Экспертиза ўтказишда фойдаланилган қонунчилик ва меъёрий ҳужжатлар	“Ўзбекистон Республикасининг Марказий банки тўғрисида”, “Банклар ва банк фаолияти тўғрисида”, Акциядорлик жамиятлари ва акциядорларнинг ҳуқуқларини ҳимоя қилиш тўғрисида”ги Қонунларига банкнинг Устави ва ички меъёрий ҳужжатлар.

Мазкур Сиёсат Ўзбекистон Республикасининг амалдаги қонунлари, Марказий банкнинг меъёрий ҳужжатлари ҳамда банкнинг Устави талабларига мувофиқ ишлаб чиқилган бўлиб, банкнинг пул маблағларини депозитга жалб қилиш, ресурсларини шакллантириш ва қайтариш ҳамда жалб қилинган маблағлар бўйича фоиз ставкаларини шакллантириш соҳасидаги фаолиятнинг асосий мақсад ва вазифалари, тамойиллари ва омиллари, пул маблағларини депозитга жалб қилиш, депозит бўйича фоиз ставкаларини шакллантириш, ҳисоб ва назорат каби масалаларни мувофиқлаштиради.

Ушбу Сиёсатни ишлаб чиқишда қонунчилик техникаси қоидаларига риоя қилинган.

Ҳуқуқшунос



М.Ғуломжонова